

# E AVENTURA DI E COMICO VALE CROES NA TURQUIA



"Aunque cu mi ta biba bon na Aruba, ariba un dia mi a pensa di bai biba na Turquía cu mi famia. Ora cu nos tabata sperando ariba e avion, mi yiu homber chiquito di cinco aña pa promer vez den su bida a mira un pastor y e la bisa mustrando na e pastoor: "Ai papa, mira un hende ey. Di ariba e ta omo y di abou e ta tanta." Mi a rabia asina tanto pa e vergüenza cu mi yiu a pone mi aden, cu mi a ranca su horea, te cu mi dos dedenan a keda cora. Na Turquía tin un rieu na unda varios vez mi sa bai pa mira y sinti e frescura di e awa." Ariba un dia, un homber cu tin un puesto grandi den gobierno a aserca mi, y a puntra mi: "Hey, bo ta kere cu mi por landa den e rieu aki?" "Claro cu si," Vale a contesta. "Pero no tin cocodrillo ey den?" e homber

a puntra. "No." E homber a keda mira Vale y despues a puntra: "Y di con bo ta sigur di esey?"

"Pasobra Cocodrillo no ta bai den awa na unda tin cayman!" E homber no a keda contento ariba e contesta cu e la haya serca Vale, y a bisa su persona lo siguiente: "Tende, ta cu un homber grandi bo ta haciendo chanza aki nan. Bo lo tende pronto mas di mi persona." Vale pa un momento a wanta su rosea aden y despues a bisa: "E homber ey sigur a kere cu ta algo mi tin gana di tendi di su persona. Lubida. Si e ta un muher ainda anto ta otro. Ariba un dia, mi a dicidi di coba un buraco den tera cu pik como gymnastiek pa los mi wesonan un poco.

Diripiente mi a haya un florin Arubiano den e buraco. Mi no a

perde tempo. Mesora mi a cohe y a hinca esaki den mi saco di carson. Y mi a dicidi di coba un buraco mas. Pasobra nunca bo no sa unda bo suerte ta. Atrobe mi a bolbe haya un florin. Ha," mi a bisa den mi mes. Mi lo sigui coba un buraco mas atrobe. Y atrobe mi a haya un florin. Asina mi a keda coba un cantidad di buraco te cu mi no ta tin forza pa lanta e pik mas. Y den cada buraco cu mi a coba, mi a haya un florin. Ora cu mi tabata for di rosea y tur muha di sodor, mi a bin realiza cu mi saco di carson ta tin un buraco aden."

## POLIS

"Pa su mayan, un cantidad di auto di polis a yega na mi cas bou di sirena. Mi a herbe di odio. Mira boso paga e porquerianan ey di hasi desordo. Mi yiu homber chiquito ta drumi." Dos di e polisnan a baha for di auto y nan a bisa mi: "Tende, nos a bin busca bo den nomber di ley!" Caramba," mi a pensa, "ta hopi importante mes mi ta, pa nan bin te akinan pa busca mi den nomber di ley. Mi a cre bai paden y a bisti un dashi, como cu esaki pa mi ta un evento grandi. Despues dos di e polisnan cada un a coi mi man tene y a hiba mi pa e auto. Esey si mi no a gusta. Dos homber teniendo mi



man. Si ta muher ainda, mi no a worry pa nan tene mi man. Pero dos homber! Ai no, y toch sinembargo mi pols ta colga bon na su lugar. Ora mi a drenta e auto, mi a mira e homber cu tabata yama su mes un persona popular. Promer mi a kere cu ta cielo e ta. E tin un uniform yen di strepi y un cantidad di strea. Despues nan a hiba mi na un prison, den cual na promer lugar mi a kere cu ta un hotel e ta. Pero e la resulta un prison.

## PAN CU AWA

Tur dia mi tabata haya pan cu awa. Na cuminzamento mi tabata tin placer den esaki. Mi ta doper pan den e awa, y despues mi ta primi e pan y laga e awa core atrope den e glas. Pero despues e pan a cuminza garna den e awa, y e ora mi a come esaki como soppi di pan. Ariba un dialuna tempran, e director di e prison y algun cipier a bin serca mi den cel. Caramba," mi a bisa den mi mes," ta awor siman a cuminza y ya mi a haya bishita. Bon-bini," drenta paden y haci boso mes na cas."  
"Sera bo boca," e director a bisa.  
"Awe ta bo delaster dia." Vale a hari y bisanan," asina dia sa pasa no! Kier meen cu mi ta liber."

"Liber? Ta for di unda bo a sali cu e palabra ey? Awe bo lo ser condena cu morto ariba stul electrico. Bo kier un delaster desayuno ainda? Bo mag escohe loque bo kier." Un sonrisa a aparece ariba cara di Vale y a bisa: "Si, mi kier un tayo di boonchi cu rabo di porco. Pero e rabonan di porco mester ta gekreul si."

"Kico? Ta na unda nos ta bai saca un tayo di boonchi cu rabo di porco gekreul asina liher?"

"No preocupa boso mes. Mi tin tempo pa spera te otro aña ainda." Despues di esey, un glas di cervex a ser treci pa Vale. Vale Croes cu tur su pasenshi a para kita e scumanan di e cervex. "Hey!" e director a grita vale. "Ta pakico bo ta kita e scumanan for di e cervex?"

"Esey ta pa proteha mi salud. Scuma ta pertenece den un wasmachine." Despues un pastor a cana drenta e cel di Vale y a bisa: "Mi yiu. . . mi a bin pa consola bo . . . Mi ta un sirbidor di "Dios"."

"Baha na awa! Aki un rato mi mes ta mira 'Dios' personalmente." Despues di e palabranan ey, un cipier a coi Vale su man tene y a bise: "Bo ta cla pa bo bai na e stul electrico? Mi ta spera cu bo no lo bai ser nervioso, pasobra abo ta e promer persona cu mi ta bai laga muri ariba un stul electrico."

"Ai no," Vale a contesta. "Ami tambe, ta promer vez cu mi lo bai sinta den un stul electrico."

Na momento cu Vale a ser hiba pa e stul electrico, ta tin un cantidad di hende presente pa no perde nada di mira y nan tabata stroba Vale di cana. "Ban mira," Vale a grita, "si mi no por pasa, e show aki no por sigui. Mi ta e persona principal." Diripiente Vale a mira su señora para entre e hendenan. "Halo mi amor," Vale Croes a saluda su señora, "ta na unda mi yiunan ta?" "Nan a keda cas," su señora a contesta. "Ai e pobernan, nunca nan no sa bai ningun caminda. Y net awe bo a laga nan na cas, mientras cu e entrada ta gratis."

Ora cu e cipiernan a yega na e stul electrico, a cuminza un problema. Vale a resulta mucho gordo, pa nan por a haya su persona den e stul electrico. Despues tambe un cipier a primi ariba un boton y candela a cuminza spart. Vale a hari pa muri y a goza un mundo pa mira vlam y vonknan blau di candela. Como cu e stul electrico a faya pa motibo cu Vale tabata mucho gordo, e la haya gratie. Awor e ta gozando di su libertad atrope na Aruba. Vale a bisa lo siguiente: "Figura bo, awor cu mi ta na Aruba, nan a manda mi, te for di Turquía un recibo cu mi mester paga di dos dollar pa e corriente cu a ser gasta cu e stul electrico. Con? Cu mi lo page. Ta loco bo ta! Paga pa un suma pa un corriente cu a falla. Pero pa e stul electrico si mi lo por paga dos mil dollar mes pe. E ta algo net bon pa mi regala mi suegra ariba su cumpliaña."



**Sintoniza tur dia  
e emisora di tur hogar  
pa e mihor  
programacionnan radial.**

**RADIO CARINA**

